

清容居士集

冊七

卷之二十一

七

清容居士集卷第三十

元 袁 桷 譔

墓誌銘 墓表 葬記

附

宣武將軍壽春副萬戶吳侯墓誌銘

往者壽春爲宿亳要衝犬牙相承城郭樓櫓移易無常所草舍殘缺狐兔出沒
道途間築覆土窖以避妻子短兵迎接利不利不復計猶持農器治田壤惴惴
求活歲率如是世祖皇帝以天兵取江南捨兩淮爲最後至元十一年冬渡江
十二年平江東抵錢塘宋社告亡十三年兩淮爭奉地圖以降無鏃刃之費天
下大定而淮始得爲樂土矣當是時吳侯祐以壽春歸職方其子安民字惠卿
侍父居顏行率部伍招輯潰卒控曹橋下獨松渡越江略定會稽台溫三城南
踰閩嶺拔莆田擒將李雄生俘其守臣而以功歸其父二大帥曰吳氏子宜第
其戰多別有以賞勵乃署千夫長十四年父卒始襲爵佩金符爲管軍總管鎮
揚州十八年大治兵伐日本拜疏請行授宣武將軍征東副萬戶領淮東西兵

以先舟師抵其國八月颶風大作器械軍士沈溺物故徧破舟亂流以經海島
高麗日本二國常不相能遇高麗邏人問所以載與還而先帝亦厭兵罷征矣
二十年建黃華反奉命往討之至政和縣獲賊將度九峯嶺接戰益急得其僞
署圖籍虜驍將以歸十有二月昧爽進軍平溪華盡死力拒砦赤巖山盡俘其
器甲族屬黃華始平迴鎮揚州二十一年省治杭州從與俱其年鎮湖州路南
潯明年調嘉興路海鹽未幾復還南潯又還鎮壽春二十四年詔領軍討交趾
至黃州罷兵二十六年鍾世明叛江西吳太仲叛興國縣搏奇蹂虛率以底寧
上功司勳輒卑退不欲言三十年移鎮和州大德四年七月某日卽世年五十
有七娶楊氏先卒子男若干人長繼武襲其爵葬于宣武侯之墓左曾祖某祖
某妣某氏予嘗聞古名將垂老呐呐若不能言祕畫勇略壯歲所施無留蘊閱
成敗得失已盡醇酒鍾鼓夫豈託焉以自完者與烏江馬君某言吳侯知儒書
後悟浮屠氏禪學充然若有得其女弟亦能爲禪人偈語是皆世所鮮有者銘

曰

維昔淮甸勁雄莫侔一夫當百鉞戈怒投裹彼乾餱聿嚴威秋養安懷惛苞桑
靡謀天錫大帝神武興邦捨其喉襟投鞭浮江俘驚擒驍百城春撞視彼彈丸
後夫卒降桓桓吳侯效命奉職以其素能昭代著績褰裳先登颺掠電激或乘
其熾或躡其跡瞻彼霍山雲流無蹤昔困于兵今黍芄芄繫帝之功維民之逢
侯之幽宮松柏茂直告而孫子靡懈靡忒法其退謙恬靜以默我思于淮作銘
示刻

同知樂平州事許世茂墓誌銘

端平三年蜀破衣冠大姓順流下東南至江陵十不存一二皆舟觸巖罅瞬息
以死淳祐三年蜀益蹙避兵來南其物故與端平無異宋主憫其流離悉擢列
在位大者輔政機備獻納外爲閫臣郡將經術史學四方取以爲宗則宋旣亡
故國世臣益困辱不自振淪胥泥塗非獨蜀士然也大德七年桷備史屬選與
虞忠肅公孫集交許君松以湖廣掾上計京師詢其官簿則顯謨閣學士給事
中少保諱奕之曾孫中奉大夫知紹熙府諡介節諱彪祖之孫奉議郎通判涪

州諱長源之子君字世茂懿範世則珠貫而櫛比語四蜀事歷歷在指掌清言雅儀筆札擅簡古卑讓恥與後進較酒至醉愈恭不復作世俗語遂締與之交至大元年授潭州權茶副使再見之貌益溫論事盡繩墨智圓氣完欲以政理自表見故其爲茶官也不務苛刻而課有贏羨仁宗皇帝立科舉以君考鄉試自喜曰吾嘗貢于鄉黜浮培實宜以稱明詔是歲君所貢士入南省號爲得人延祐五年授徽州路婺源州判官復與語輒愀然曰吾家由開慶初辭簡池寓南康墳墓井邑生別踰五十年貧不能忘祿齷齪州縣弗得以文墨顯吾何爲哉其治婺源益自振剔絕蔓探疑明以近民而盜跡不敢入境至治二年見其神益清貌益癯舉酒屢酌卻雋永猶喜議當世事桷與翰林直學士曹君元用子貞共署薦爲湖廣提舉儒學思以供其老集賢直學士鄧君文原善之亦曰是舉誠不忝吾爲江東分部使者嘗舉其政事文學矣十一月授承直郎饒州路同知樂平州事歲終得上氣疾正月甲午終于邸舍年七十有二曾祖妣某氏祖妣某氏妣某氏娶趙氏再娶陳氏子男若干人女若干人孫男若干人始

君居南康閉門授徒以奉母右丞燕公公楠開營田司知其賢取以爲佐後遷行大司農益任之掾湖廣省六七年能以儒術輔法令事明理融無底滯固陋一時吏師尊禮之君始生踰百日晝夜啼不止有僧祝其頂曰汝爲許氏子啼何爲耶啼乃止未幾涪州下世年八歲隨舅氏茶馬趙君寓江陵里有災能取涪州神主奉以逃稍長益自奮勵諸老咸器偉故晚歲宦業雖不大顯而行事有足稱者其喪歸以某月某日葬于某原子肱踵門以廣信劉君光事狀泣曰願請銘桷泣相向不復辭嘉定更元韓侂胄誅解僞學禁先少師正獻公會大父樞密越公相繼入著作庭給事中少保許公魏科首班著善類肅穆天下傾動未幾少保論外戚不合去今幾百二十年閱昔時題名求其嗣續率皆澌盡銷鑠而桷與世茂俱爲曾孫相顧自保灰編墜簡證世德之舊於世茂實有望今死矣雖欲勿哀其可乎銘曰

蜀由秦開千載底寧英光蜚聲山川耀靈漢魏啓伐不假以兵唐宋踵規開門晝迎錦楹繡牆夸浮日矜帝鑒地圖百神震驚旣車轟轟金戈晶熒自西徂東

舳艫貫繩或沈于淵或疫以乘蹇蹇許公疑丞弗登是生介節嬰彼孤城恂恂涪州弱息慎承流離拮据守其書籙儒以飭身政以裕名匪急於祿抗宗希成凡我士族欒范是懲東南之區凜其春冰我思許君是用述銘

任隱君墓誌銘

鄞甬東橫溪多郡宗故家楠之七世祖祥符丞而下娶婦皆楊氏少保夫人曰申國太保曰越國魯國太師曰齊國幾三百年矣楊袁爲中外表歲時往還無虛日而甬東任氏與楊姻婭亦十餘傳一日任氏子元善介予表兄楊仁之以其先君子之狀求銘復錄其十九世祖唐建州司馬遠之葬記以示其記曰建州生佶檢校尚書工部員外郎兼侍御史是生崇試循州司馬循州生貞幹元和十三年補集賢殿供奉承旨後爲越州都督府功曹參軍以終集賢生行規大中時以明經薦于鄉舉上第爲蘇州司兵參軍吾里士族莫先於樓袁楊蔣作郡志者於任有缺仕莫榮於集賢承旨承旨布衣爲者也職譔述校理在元和時任不輕畀司兵以明經登唐上第尤偉著志亦不紀考孫吳有任光任奕

皆鄭句章人今其地爲鄞縣則建州蓋二賢之裔而先賢皆遺軼比予補郡乘亦缺然有愧矣嘗考大中以後鄞數爲盜侵掠城燬蕩遷徙錢氏以宗親專節鎮租稅刮剝民不堪奉昔時故族躡藉銷鑠於任氏概可見至宋受版圖興文儒鄞士在汴始盛渡江以南雲滄川湧幾二百年而不幸數十年詩書廢墜望塵執隸欲爲任氏十九世之傳不可得噫可勝歎哉可勝道哉任君名天祺字君瑞曾祖汝諒祖用康父逢龍其居鄉善保衛徵調數起先事以備縣胥不能高下友其弟天麟弟病酒死曰吾不可使弟無後殯其喪俟我死必俱葬也大德七年六月某日卒年五十有八未幾弟婦顧氏亦卒以其遺言大德十一年十二月丁酉奉柩與弟及婦俱葬于吳公山之祖塋妻屠氏四子元善可善承弟後達善兼善孫男四立道弘道鳴道原道孫女三立道楊氏壻也銘曰
世胄曰顛任譜完堂堂文藝志錄傳昔通今晦理則然鄉井急誼手可捐金峨東聳下泓泉蹇極遇順盈百川我銘考官以昭先歷十九世緒益延焯哉任恤德靡愆率而雲仍亘千年

史景賢墓誌銘

君諱章卿字景賢鄞史氏故國世臣太師丞相保寧軍節度使越忠定王諱浩
爲曾祖妣貝氏魏越國夫人大師中書令保寧昭信軍節度使衛忠獻王諱彌
遠爲祖妣潘氏齊魯國夫人觀文殿學士正奉大夫奉化郡公諱宇之爲考妣
趙氏高平郡主君幼成合矩度進退持奉侍立占對識者知真王孫筆墨書史
楚楚自將皆有法郡公目送深念之稍長鉛采自陶寫蒼松斷崖昂然有遺世
意宮商敷宣綵鸞詠而鳳幽鳴也退靜韜匿冥會于千載之上察其念良是矣
郡公職二品君當以京官入仕生晚祿弗及至治三年秋八月得上氣疾卻藥
賦詩出別語於宗親桷時官京師呼桷子瓘立牀下曰爲吾語而翁求銘以昭
吾志焉越翌日辛酉果卒嗚呼年甫四十有八章綬積襲隱顯有定數至於年
亦不得永是可哀也已維忠定王桷外高祖幼習外家獻文世德相業焯在宋
史不敢論獨敘三世壽考以增君之悲維忠定以三公居東湖三十年陪祠慶
壽秀骨山立多士秉笏交語曰史太師真壽相年八十有九卽世忠獻獨相二

宗二十有七年總核庶政燭照數納罔有缺年七十以終郡公恂退若癯儒龐眉素毫冰玉照焜鄉黨年七十有九乃終壽種彰灼若是君才不得一見施設年又不能以紹傳是大可哀也已子一性孫女二將以某年某月葬鄞縣陽堂鄉金輿之原銘曰

寥寥東陵瓜圃熟沈冥里閭企高躅達人知命化不慝手持參差入雲谷周公魯公儼初服奉著以占剝斯復學詩習禮在嗣續我銘孔悲辭匪瀆佳城鬱蒼覘宰木

袁州知事孔君墓誌銘

大德初元孔君昭孫明遠甫爲慶元儒學正于時禮部尙書王先生應麟師表後進門無雜賓明遠以通家子執疑證訛桷每連席請益時則有教授某恣睢自負語侵先生乃憤然曰吾不能與之共處疏其謬誕十數事鳴于憲府人益奇其伉直有先中丞遺風是後爲蘄陽教授蘄陽舊爲邊障地君能化其俗使稍就學久之丕變爲儒士皇慶元年授慈溪縣主簿郡人咸曰是斥故教授者

飭躬以廉民莫敢病未幾江浙省取爲掾會歲侵計富人籍田出粟以賑吏不能舞文粟悉入市其直輒減宰輔奇之延祐年授從仕郎袁州知事秩滿泰

定元年以疾卒時年六十有二君實孔子五十二世孫中丞爲大宗傳四十有七世中奉公傳與其從子玠南徙三衢賜廟譜牒章灼而君之考諱某咸淳間爲名太守後僉書樞密院事職進資政殿大學士而大父某亦贈太子少師諡文介曾大父諱某贈某官妣某氏某氏俱贈郡夫人噫士常患爲世家紹宗趾嫩懼難以繼仕顯矣德不稱無取也言足以斥姦發揚剛毅是則於孔君見之仕雖不大振於孔君何憾焉予嘗與君由義烏同邸宿至婺學旬日危坐論古今各欲以名節相勉而懷奇抱介予輒讓不敢今歸老田里期爲全人思一見明遠不可得至是淇來請銘安得勿哭也已娶王氏前進士集之女男六淇剛繼兄後海蚤世涓繼弟後建德儒學正瀛慶元昌國州儒學正澣早夭女二適山陰王壩富春張順可某年某月葬葉水浮河原銘曰

金淮而冰清行之成也白兮不緇德之貞也憤世嫉阿全粹精也謝彼戚施實

靖蛉也銘以揭之歸藏永寧也

僉事范君墓誌銘

大德六年范君子誠爲平江路經歷于時桷將之京師道吳其郡大夫疑忌事多不決范君抱牘堂上定可否大夫領領不復有異議人皆曰是真贊畫才嗣後爲掾中書仁宗皇帝在東宮興崇禮文廣廟祭凡視執政者率增贊書桷時日具紙墨君排剔研討使各中繩式莫有訾議嗣爾厭繁劇告外補湖州推官又爲黃巖州州與鄞相犬牙治跡賢否嘗耳接巷議州民來鄞必曰吾州黃氏子號豪民范侯能挫抑之帖首受罪後予直集賢黃巖之儒生暨商于城垞者咸告曰黃生易黃冠訴范侯以不直遂議于大學士郭公訖不受其說精神籠絡貫穿于儒術法律將大展其用而其子景文踵門泣以告曰先君之不祿在泰定二年閏月某日得年七十道遠不克歸葬以是歲二月某日與大父奉議君俱葬于平江路長洲縣武丘鄉白蓮橋之北原知先君莫如子敢以銘請謹按君諱忠其先京兆藍田人後籍真定今三世矣其爲仕首受史丞相之孫耀

辟爲浙東宣慰府掾改受蘭溪主簿再辟江浙行省掾乃授平江路經歷又授揚州路經歷不赴改辟都省掾授湖州路推官以選能爲海道府千戶分治四明知台州黃巖州英宗皇帝詔風憲舉守令再知徽州婺源改同知福建轉運鹽司事泰定元年擢僉江南浙西道肅政廉訪司事其簿蘭溪嘗攝尉事捕造僞楮當受賞君謝不取在湖州有訟弟死非命且疑弟婦受賂焚其尸君錄囚考弟實以鬪死婦始得脫湖多淫祠毀三百六十以治官舍分漕四明首拓廳事嚴竦治具新天妃宮以肅祠使其治黃巖黃氏事最著正彝倫絕攘奪尸祝口誦宜著于郡乘婺源俗尙競渡易其舟爲浮梁民不病涉在閩中鹽足於民而私貿者悉絕考其所居官興建鋤擊爲己任絕功利守名實爲君素志迄不展大用壽與祿不失其願亦可無憾矣嘗鑄禮殿祭器書二千卷歸于鄉學集賢王公仲常爲文以美篤于慈孝頒宗錄孤故贈禮部郎中白公某壯歲深奇之妻以女君感知己凡所爲樂府稗刻以傳曾祖昂霄金大安元年進士官正議大夫同知靜難軍節度使兼邠州觀察使祖元泰元授從仕郎同知解州事

父天祐汀州路經歷贈奉議大夫真定路趙州知州驍騎尉元氏縣子景文由
臨安主簿辟江浙行省掾敏修善吏事其進將未艾孫二公琇公剡孫女五乃
爲銘曰

吏詬于儒以儒爲拘儒以病吏其刻莫渝據會統宗孰承其傳溫溫范侯趾嫩
紹先化其奇觚不急以干削豪翦強欲援以手謂不大逢亦旣祿壽世方尙名
我獨倚之彼喜以功縮武避之武丘之原松柏峙植魂無不之子孫承式

鄭照磨墓誌銘

鄭威敏公驤以靖康虜難死同州紹興錄孤裒忠賜廟愍節至于其孫建德登
進士第延賞守祠世嗣不絕五世孫諱元貞實奉祠事孫曰端是生汝賢爲
江西安撫司準遣生檜爲都酒庫官君之父也君諱文瑞字子祥生而骨相殊
特府君深奇之稍長從鄉先生課程文有能聲科舉旣廢居里閭以孝謹稱至
元間下令舉儒吏實預首選試郡功曹移典玉山郡侯復取自近省授監平江
路倉轉海道萬戶案牘官再爲海鹽州案牘轉行省鈔庫副使平江庾氏歲入

浩夥不得脫君獨以治辦稱海鹽多豪民殺人率遣奴償死君能直之行省積
敝楮三年不毀君上言申其數而歲除之後取以爲法泰定元年勅授將仕郎
浙東道宣慰司照磨兼承發架閣予見君於京師言議縝密剴割苛冗中繁節
暨官帥司下帷沈思吏跡不入戶勾稽研覈充然益有餘地古之善居官者必
自持家始自衣冠丘墟不復給足荷戈負耒何可勝道念昔信實要衝君獨善
理其身掇拾化治任能竭力相其天時權其贏奇卒昌於官以發其素蘊是殆
於君見之抑又聞之流光演休首於死節宋社云亡忠義之錄一二僅見則威
敏之澤雖十世未艾君續其承猗與盛哉其卒在泰定三年九月某日年六十
有三某月某日葬某縣某鄉子男四謙亨復亨鼎亨泰亨女三嫁黃中正孫良
玘葉原道皆仕族孫男七孫女七娶姚氏曾祖妣蘧氏祖妣劉氏妣謝氏謙亨
奉柩將歸里踵門泣以告曰先生故大門知官譜唯詳而吾里獲銘者數家矧
先子世系若是敢以請銘曰

志專豐崇足昌其躬家傳於忠蹇事于公美玉襲之良馬繫之不泄不辱云紹

以續作之怵怵承之競競而子而孫視我斯銘

文清薛處士墓誌銘

孔子敘逸民謂其求志達道超然於塵垢之外心若槁木形若蟬蛻動莫有跡行莫可名其混世也物莫與俱冥神內觀返真潛虛若是者其近之矣故昔之善晦匿者草衣菲食不導引以壽養其天年恣縱泉石歷探遠挹興至而若遺擇幽絜以養其雅操求於世吾不得而見之矣今得一人焉曰處士薛君勉薛君信州貴溪故儒家自其曾大父子徹以儒科縣南丹大父琢父士亨繼業進士君益以儒自勵居鄉黨教授名不蘄彰沖然有容守約自裕游湖湘極交廣返築室于宜陽納幽據勝爲堂曰寶善以示子孫泰定三年四月某日卒年六十有八族黨姻戚咸會哭曰先生儒以紹傳茲其爲文也宜矣固窮而無求貽書以遺後其得不謂之清乎遂私諡之曰文清子二玄義玄儀玄義與余爲方外交在崇真宮數評議吾徒所當爲事詞章清峭翰墨簡絜每視之嘗以爲不可及君旣死求銘於余實不敢辭在易蠱之上九不事王侯高尚其志而初爻